

Makam-makam Lama di Bukit Inas, Batu Pahat: Satu Laporan Awal

Oleh

DR. OTHMAN YATIM

Jabatan Muzium

Pada pagi 21 Oktober 1987 yang lalu hampir seluruh rakyat Malaysia, khususnya yang berketurunan India di seluruh negara telah merayakan Hari Deepavali yang telah pula diisytiharkan sebagai satu hari kelepasan am. Tetapi penduduk di Bukit Inas (lihat Peta), kira-kira 9 km ke selatan Parit Sulong, Batu Pahat, Johor, pada pagi itu mereka keluar beramai-ramai untuk bergotong royong membersihkan kawasan perkuburan yang terdapat di kampung tersebut. Tradisi ini telah berlangsung sejak lima belas tahun yang lalu. Ianya dilakukan pada setiap hari Rabu terakhir dalam bulan Safar. Pada tahun ini upacara itu berlangsung pada hari Rabu 21 Oktober 1987 yang bertepatan pula dengan Hari Deepavali. Biasanya selepas upacara gotong royong itu diadakan pula kenduri atau makan beramai-ramai seperti satu perkelahan. Ianya mengingatkan saya kepada temasya Mandi Safar yang diraikan oleh rakyat Malaysia keturunan Melayu pada suatu masa dahulu.

Rombongan kami dari Muzium Negara yang terdiri dari Sdr. N.A. Halim, Drs. Zakaria Ahmad, Pengarah Muzium Banda Aceh yang sedang melawat Malaysia dan saya sendiri telah sampai di Parit Sulong tepat jam 8.30 pagi. Kami berada di sana adalah atas undangan Tuan Haji Md. Khamis bin Haji Juned, Setiausaha, Persatuan Sejarah Malaysia, Kawasan Batu Pahat (PSMKBP).¹ Seperti yang dijanjikan kami bertemu dengan Tuan Haji Md. Khamis di Balai Polis, Parit Sulong dan dari situ kami telah dibawa oleh beliau ke pengkalan jeti Loji Air, Parit Sulong di mana kami telah disambut oleh beberapa orang Ahli Jawatankuasa PSMKBP. Dari situ rombongan kami telah menaiki sebuah motorbot untuk ke Bukit Inas iaitu ke hulu Sungai Batu Pahat (Gambar 1). Perjalanan kami hanya mengambil masa lebih kurang lima belas minit sahaja. Semasa rombongan kami tiba di kampung tersebut penduduk di situ sedang bergotong royong membersihkan kawasan perkuburan yang hendak kami lawati itu

Kepada saya, kawasan perkuburan tersebut adalah merupakan satu kawasan perkuburan yang agak luar biasa kerana pada akhir tahun 1985 telah dilaporkan bahawa di kawasan itu telah ditemui enam buah kubur lama (*Utusan Malaysia*, Khamis 8 Ogos 1985). Kawasan itu sendiri telah dianggap sebagai kawasan kediaman yang tertua di Batu Pahat iaitu sebelum Bandar Penggaram dibuka dalam tahun 1894.

Dalam kawasan perkuburan yang seluas kira-kira empat ekar itu terdapat satu kawasan yang ditinggikan sedikit seperti busut atau batas, di atasnya terdapat empat pasang batu nisan dari jenis apa yang saya panggil batu Aceh. Batu-batu nisan jenis ini mengikut kajian saya (lihat *Batu Aceh: Early Islamic Gravestones in Peninsular Malaysia* yang diterbitkan oleh Persatuan Muzium Malaysia) memang telah dipertukangkan di Aceh, Sumatra Utara.

Keempat-empat pasang batu nisan itu mempunyai ukuran yang berbeza-beza tetapi tiga pasang darinya mempunyai bentuk yang hampir sama iaitu bentuk leper atau pipeh iaitu dari kategori yang saya panggil "Othman Type C"². Bentuk nisan yang

1 Kami ingin mengucapkan ribuan terima kasih kepada Tuan Haji Md. Khamis kerana telah bersusah payah mengatur lawatan ini.

2 Lihat Rajah 1 untuk melihat jenis-jenis atau kategori-kategori batu Aceh yang saya panggil "Othman Types A-N" yang telah di jumpai di Semenanjung Malaysia.

sebegini dianggap sebagai telah digunakan bagi menanda kubur-kubur orang perempuan. Batu nisan yang sepasang lagi berbentuk tinggi dan bersegi empat dan bahagian puncaknya bertingkat-tingkat iaitu dari kategori yang saya panggil "Othman Type G". Batu nisan yang berbentuk demikian biasanya dipercayai menandakan kubur seorang lelaki (Gambar 2).

Pada permukaan batu-batu nisan itu terdapat ukiran dalam bentuk tulisan kalimah *syahadah*.³ Tidak ada sebarang catatan mengenai nama si mati atau tarikh kematian pada batu-batu tersebut. Inilah salah satu kerumitan yang sering dihadapi oleh seorang penyelidik apabila mengkaji batu-batu nisan lama. Di antara batu-batu nisan itu ada yang serupa dengan yang telah dijumpai pada awal tahun 1986 di Kampung Pulau Meranti, Beruas, Perak.⁴

Ke timur sedikit dari kubur-kubur itu terdapat satu lagi batas yang mengandungi dua buah kubur yang ditandakan dengan batu nisan dari kategori-kategori yang saya panggil "Othman Type A dan F" (Gambar 3-4). Dari bentuk kedua-dua pasang batu nisan tersebut saya percaya orang-orang yang dimakamkan di situ ialah sepasang suami isteri. Walau bagaimanapun tidak terdapat sebarang tulisan pada permukaan batu-batu nisan tersebut, meskipun terdapat tempat yang disediakan untuk diukirkan dengan tulisan di kedua-dua belah permukaan batu-batu tersebut. Berdasarkan penelitian saya terhadap batu-batu nisan yang terdapat di kedua-dua batas itu, saya berpendapat batu-batu nisan yang terletak di atas dua buah kubur yang terakhir itu agak tua sedikit. Batu-batu jenis ini, berdasarkan kajian saya juga, telah diperbuatkan di Lhoksuemawe, Samudera - Pasai sebelum tahun 1500 ataupun terdiri dari batu nisan yang saya kategorikan sebagai batu Aceh yang telah diperkenalkan di Semenanjung Malaysia di zaman kerajaan Melayu Melaka. Saya telah melihat sendiri batu-batu nisan serupa itu di Lhoksuemawe, Samudera-Pasai dan ini telah disahkan lagi oleh Bapak Drs. Zakaria Ahmad dari Aceh yang turut serta dalam rombongan kami ini.

Semasa merayau-rayau di dalam kawasan perkuburan itu Sdr. N.A. Halim telah menemui satu lagi batas yang mengandungi dua buah kubur lama. Semasa ditemui itu terdapat hanya tiga buah batu nisan. Pasangan bahagian kaki salah satu kubur itu telah tertimbus dan tidak kelihatan. Walau bagaimanapun ianya telah dijumpai apabila satu penggalian dibuat di tempat yang biasanya terletak nisan bahagian kaki kubur (Gambar 5-6). Jadi dengan penemuan yang baru itu kini terdapat tiga buah batas yang mengandungi lapan pasang kubur lama di Bukit Inas. Saya tidak menolak kemungkinan bahawa banyak lagi kubur-kubur yang menggunakan batu Aceh di kawasan perkuburan Bukit Inas itu, yang masih belum ditemui.

Sebenarnya dalam kawasan perkuburan yang sama iaitu di sekitar kubur-kubur berbatu Aceh di atas batas-batas tersebut terdapat banyak lagi kubur lama tetapi menggunakan nisan yang diperbuat dari batu pejal dan ada juga dari batu sungai sahaja. Kawasan di persekitaran perkuburan itu ditumbuhi oleh pokok-pokok besar dan pohon-pohon buah-buahan. Ianya menggambarkan satu kawasan kediaman atau penempatan yang telah lama ditinggalkan. Kawasan tersebut mengingatkan saya kepada satu kawasan permakaman lama yang telah lama ditinggalkan di Bukit Ketupat, dekat Jerantut, Pahang. Di kawasan permakaman tersebut terdapat makam Sultan Muhammad Shah atau Marhum Sheikh dan keluarganya. Baginda mangkat di sekitar tahun 1480-an. Kebetulan batu-batu nisan yang terdapat di makam tersebut hampir sama bentuknya dengan batu-batu

3 Untuk lain-lain jenis tulisan dan perutusan yang terkandung di dalamnya lihat Othman Mohd. Yatim (1988:59-75).

4 Untuk penerangan lanjut mengenai perkara ini lihat Othman Mohd. Yatim, "Beruas: Satu Rekonstruksi Sejarah", *Gema Perak*, Bil. 1, Jilid 11, Jun 1987.

nisan di Bukit Inas.

Selepas bergotong royong bersama-sama dengan penduduk tempatan dan sebelum rombongan kami berangkat pulang kami telah dijamu oleh Encik Abu Dakam bin Ahmad yang lebih terkenal dengan panggilan Wak Dakam dengan jamuan makam tengah hari. Semasa perjalanan pulang itu benak saya ditubi dengan berbagai-bagai persoalan. Siapakah yang telah disemadikan di Bukit Inas itu? Luas kawasan perkuburan dan jumlah kubur-kubur yang masih kekal di situ membuktikan bahawa di persekitaran kawasan kubur itu pada suatu masa dahulu tentunya pernah mempunyai penduduk yang ramai. Tetapi siapakah mereka itu? Ke manakah perginya keturunan mereka itu kini? Penduduk yang menduduki kawasan itu sekarang ini mengatakan yang mereka tidak ada kena mengena dengan orang-orang yang bersemadi di kawasan perkuburan di kampung mereka itu, atau dengan lain-lain perkataan, kubur-kubur tersebut telah sedia wujud di kawasan itu semasa mereka mula-mula pindah ke situ kira-kira dalam tahun 1969. Kalaulah kawasan itu pernah didiami oleh orang-orang yang terdahulu dari peneroka yang sekarang ini, kenapakah tempat itu ditinggalkan begitu sahaja? Persoalan-persoalan tersebut tambah menjadi misteri lagi apabila di persekitaran kawasan perkuburan itu sejauh ini belum lagi ditemui sebarang tanda-tanda yang boleh dihubungkan dengan penempatan zaman lampau di kawasan itu. Ini disahkan sendiri oleh Wak Dakam yang telah mula meneroka kawasan itu dalam tahun 1969. Adakah ianya memang satu kawasan permakaman? Buat masa ini dan tanpa penyelidikan yang lanjut saya masih belum dapat memberikan jawapan ataupun mengemukakan andaian-andaian kepada persoalan-persoalan tersebut.


Walau bagaimanapun teman-teman di PSMKBP percaya bahawa salah satu dari kubur-kubur itu ialah kubur Tun Ahmad atau Tun Mamat, Bendahara Melaka di zaman Sultan Mahmud Shah yang terakhir memerintah Melaka. Pendapat ini adalah berdasarkan kepada catatan yang terdapat dalam buku *Ringkasan Tawarikh Orang kaya-Orang kaya dan Penghulu-penghulu Batu Pahat*⁵ yang ada menyebut bahawa Tun Ahmad atau Tun Mamat telah dimakamkan di Bukit Inas. Kalau catatan dalam buku itu boleh diterima, besar kemungkinan salah satu kubur yang saya sebut sebagai kubur-kubur yang menggunakan batu Aceh dalam zaman Melaka itu, adalah kubur Tun Mamat. Kalaulah kenyataan ini dapat disahkan memang benarlah dakwaan PSMKBP yang mengatakan bahawa kawasan Bukit Inas itu adalah kawasan yang tertua pernah didiami dalam daerah Batu Pahat.⁶

Buat sementara ini apa yang dapat saya simpulkan iaitu berdasarkan bentuk-bentuk batu-batu nisan di situ ialah bahawa kawasan itu adalah satu kawasan lama yang sungguh bersejarah yang telah wujud sekurang-kurangnya dalam zaman kerajaan Melayu Melaka sekitar tahun 1600-an. Ini dibuktikan dengan kehadiran batu-batu Aceh dan kenyataan dalam buku *Ringkasan Tawarikh Orang kaya-Orang kaya dan Penghulu-penghulu Batu Pahat* yang menyebut seorang Bendahara Melaka telah dimakamkan di situ. Sesungguhnya ia merupakan satu tapak sejarah yang penting yang harus diberikan perhatian yang serius dari segi pemeliharaannya kerana ia mempunyai potensi yang besar dari sudut pelancongan.

5 Saya ingin mengucapkan ribuan terima kasih kepada Tuan Haji Md. Khamis kerana telah memberi saya satu salinan fotokopi buku ini.

6 Mungkinkah semasa batu-batu nisan ini digunakan Batu Pahat adalah di bawah naungan kerajaan Melaka? *Sejarah Melayu* ada menyebut nama Batu Pahat semasa Siam menyerang Melaka. Pada masa itu Melaka adalah di bawah pemerintahan Sultan Muzaffar Shah (1445–1458). Lihat Haji Buyong Adil (1980:3).


1. Buyong Kadi, Haji - Sejarah Johor, Kuala Lumpur: Dewan Bahasa & Pustaka, 1980.
2. Daud bin Sulaiman bin Mohd. Salleh - Rangkaian Jawatankuasa Orang Asli, Kuala Lumpur: Dewan Bahasa & Pustaka, 1980.
3. Othman Mohd. Yassin, Dr. - Batu Aceh: Jenis-jenis Batu Aceh dan Penggunaannya di Semenanjung Malaysia, 1988.




Rajah 1: Jenis-jenis Batu Aceh yang telah dijumpai di Semenanjung Malaysia.
(Othman Types A-N)

Rujukan

1. Buyong Adil, Haji — *Sejarah Johor*, Kuala Lumpur: Dewan Bahasa & Pustaka, 1980.
2. Daud bin Sulaiman bin Mohd. Salleh — *Ringkasan Tawarikh Orang kaya-Orang kaya dan Penghulu-penghulu Batu Pahat*, Parit Jawa, Muar: Mahmudiah Press.
3. Othman Mohd. Yatim, Dr. — *Batu Aceh: Early Islamic Gravestones in Peninsular Malaysia*, Kuala Lumpur: Persatuan Muzium Malaysia, 1988.



Lokasi Makam Bukit Inas, Batu Pahat, Johor.



Bukit Inas, Batu Pahat, Johor.



Anggota rombongan menaiki sampan untuk ke Bukit Inas



Salah satu batu nisan yang terdapat di Bukit Inas.



Salah satu batu nisan yang terdapat di sebelah timur makam utama.



Makam-makam yang terdapat di sebelah makam utama.



Makam yang telah ditemui semasa lawatan rombongan kami.



Salah satu batu nisan di makam yang baru ditemui yang telah tertimbus.